

**ZAKON**  
***O SUDU BOSNE I HERCEGOVINE***

## **OPĆI DIO**

### **Član 1. Osnivanje**

1. Da bi se osiguralo efikasno ostvarivanje nadležnosti države Bosne i Hercegovine i poštovanje ljudskih prava i vladavine zakona na njenoj teritoriji, osniva se Sud Bosne i Hercegovine (u daljem tekstu: Sud).
2. Sjedište Suda je u Sarajevu.

### **Član 2. Sastav Suda**

Sud sačinjava 15 sudija.

### **Član 3. Uslovi za obavljanje funkcije**

1. Za sudiju Suda imenuje se državljanin Bosne i Hercegovine koji je diplomirani pravnik i ima položen pravosudni ispit i iskustvo u radu u pravosudnim tijelima ili advokatskoj kancelariji u trajanju od najmanje deset godina.
2. Izuzetno, za sudiju Suda može biti imenovan docent ili profesor sa jednog od pravnih fakulteta Bosne i Hercegovine iz predmeta krivično pravo ili krivično procesno pravo, građansko pravo ili građansko procesno pravo, odnosno upravno pravo, privredno pravo ili porodično pravo.

### **Član 4. Izbor sudija**

Parlamentarna skupština Bosne i Hercegovine bira sudije Suda na prijedlog Komisije za imenovanje sudija Suda.

### **Član 5. Komisija za imenovanje sudija Suda**

1. Komisiju za imenovanje sudija Suda sačinjava 6 članova koji su državljani Bosne i Hercegovine. Članovi Komisije su predsjednik i dva zamjenika predsjednika Ustavnog suda Bosne i Hercegovine, predsjednik i zamjenik Vrhovnog suda Federacije Bosne i Hercegovine i predsjednik Vrhovnog suda Republike Srpske.
2. Predsjednik Komisije bira se na konstituirajućoj sjednici.
3. Sva ostala pitanja uređuju se Poslovníkom o radu Komisije. Poslovník o radu se donosi na prvoj sjednici Komisije koja se održava u roku od 30 dana od dana stupanja na snagu ovog zakona.
4. Komisija može vršiti i druge funkcije koje su utvrđene zakonom Bosne i Hercegovine.

### **Član 6. Trajanje funkcije**

Imenovane sudije obavljaju sudijsku funkciju do dobi od 70 godina, ako ne nastupe okolnosti predviđene članom 7.

## **Član 7. Mandat sudija**

1. Sudiji funkcija prestaje:
  - a) istekom perioda na koji je imenovan prema članu 65.;
  - b) podnošenjem ostavke, što potvrđuje Sud na općoj sjednici;
  - c) trajnim gubljenjem sposobnosti da vrši funkciju sudije zbog bolesti, invalidnosti ili zdravstvenih teškoća, a na osnovu mišljenja nadležne ljekarske komisije i odluke Suda na općoj sjednici;
  - d) smjenjivanjem sa funkcije od strane Parlamenta, a na prijedlog opće sjednice Suda.

## **Član 8. Nespojivost funkcija i imunitet**

1. Sudijska funkcija je nespojiva sa drugom javnom ili privatnom službom. Sudija Suda, kao ni kandidat za sudiju Suda, ne može obavljati poslove u organima stranke, političkih udruženja ili fondacija koje su povezane sa strankom, niti može biti uključen u bilo kakvu političku ili stranačku aktivnost javnog karaktera. Izuzetak od ovog pravila čini nastavnički i naučno-istraživački rad u oblasti prava.
2. Sudija Suda ne može biti krivično gonjen, ispitivan, zadržan, uhapšen niti mu se može suditi za mišljenje koje je izrazio ili za odluku koju je donio u vršenju ovlaštenja koja ima u okviru svoje funkcije.

## **Član 9. Jezik**

1. U postupku pred Sudom i u obraćanju Suda sa strankama u upotrebi su službeni jezici Bosne i Hercegovine - bosanski, hrvatski i srpski jezik, te oba pisma - latinično i ćirilčno pismo. Učesnici u postupku imaju pravo upotrebljavati bilo koji od službenih jezika i pisama u svim radnjama postupka.
2. Okrivljeni može u krivičnom postupku upotrebljavati svoj jezik u bilo kojoj radnji tog postupka. Ako se postupak vodi na jeziku koji okrivljeni ne zna, osigurat će se usmeno prevođenje koje obavlja službeni tumač. Okrivljeni će se poučiti o pravu na prevođenje i tog se prava može odreći ako zna jezik na kome se vodi postupak. U zapisniku će se zabilježiti da je učesniku data pouka, kao i njegova izjava.

## **Član 10. Poslovnik Suda**

1. Poslovnikom Suda uređuju se postupci pred svim odjeljenjima Suda u onoj mjeri u kojoj nisu uređeni zakonima na koje se u ovom zakonu upućuje. Kod vođenja postupka poštuju se osnovni principi predviđeni ovim zakonom.
2. Poslovnik Suda objavljuje se u "Službenom glasniku BiH".

## **Član 11. Budžet Suda**

1. Sud ima svoj budžet, koji je sastavni dio Budžeta Bosne i Hercegovine.
2. Predsjednik Suda je zadužen, uz pomoć generalnog sekretara, za pripremu i izvršavanje budžeta Suda.

## **Član 12. Punomoćnici**

1. Da bi se punomoćnik pojavio, odnosno postupao pred Sudom, mora biti upisan u imenik advokata nadležnog tijela u Bosni i Hercegovini priznatog od strane Suda.
2. Sud može u svakom pojedinačnom slučaju posebno dozvoliti postupanje pred Sudom punomoćniku koji ne ispunjava uslove iz prethodnog stava.
3. Poslovníkom Suda utvrđuje se postupak za posebno postupanje punomoćnika, kao i za priznavanje tijela koje izdaje dozvole za advokate.
4. Poslovníkom Sud određuje uslove i način obavljanja rada svih punomoćnika u postupku pred Sudom, naročito uključujući pravo da, po sopstvenoj ocjeni, izrekne sankciju punomoćniku u postupku pred Sudom.
5. Sankcije iz prethodnog stava mogu uključiti suspenziju ili ukidanje dozvole za rad pred Sudom kao i svaku drugu sankciju utvrđenu zakonom i Poslovníkom suda.

## **NADLEŽNOST**

### **Član 13. Krivična nadležnost**

1. Sud je nadležan za krivična djela utvrđena zakonom države Bosne i Hercegovine kad se tim zakonom određuje nadležnost Suda za ta krivična djela.
2. U nadležnosti Suda je također da:
  - a) zauzima konačan i obavezujući stav vezan za provođenje zakona države i međunarodnih ugovora na zahtjev bilo kojeg suda entiteta ili bilo kojeg suda Brčko Distrikta kojem je povjereno provođenje zakona države;
  - b) odlučuje o pitanjima koja se tiču provođenja međunarodnih i međuentitetskih krivičnih propisa, uključujući i odnose sa Interpolom i drugim međunarodnim policijskim organima, te uključujući transfer osuđene osobe, izručenje i predaju osoba po zahtjevu bilo kojeg organa na području Bosne i Hercegovine, druge države, odnosno međunarodnog suda ili tribunala;
  - c) rješava sukob nadležnosti između sudova iz Federacije Bosne i Hercegovine i Republike Srpske, i sudova entiteta i sudova Brčko Distrikta;
  - d) odlučuje o ponavljanju krivičnog postupka za krivična djela predviđena zakonima države Bosne i Hercegovine.

### **Član 14. Upravna nadležnost**

1. Sud je nadležan da odlučuje po tužbama protiv konačnih upravnih akata, odnosno kada se radi o upravnoj šutnji, institucija Bosne i Hercegovine i njenih tijela, javnih agencija, javnih korporacija, institucija Brčko Distrikta i drugih organizacija utvrđenih zakonom države Bosne i Hercegovine, donesenih u vršenju javnih ovlaštenja.
2. Sud je naročito nadležan da:
  - a) ocjenjuje zakonitost pojedinačnih i općih izvršnih upravnih akata donesenih na osnovu državnog zakona, pri vršenju javnih funkcija organa vlasti Bosne i Hercegovine iz stava 1. ovog člana, za koje zakonom nije predviđeno sudsko ispitivanje;

- b) rješava imovinske sporove između države i entiteta, između države i Brčko Distrikta, između entiteta, između entiteta i Brčko Distrikta i između institucija Bosne i Hercegovine koje su povezane sa vršenjem javnih ovlaštenja;
- c) rješava sukob nadležnosti između sudova iz entiteta, i sudova entiteta i sudova Brčko Distrikta;
- d) odlučuje o ponavljanju postupka u sporovima iz stava 1. i tač. a) i b) ovog stava.

#### **Član 15. Apelaciona nadležnost**

1. Sud je nadležan da odlučuje po:
  - a) žalbama protiv presuda ili odluka koje donese krivično odjeljenje ovog suda, u smislu člana 37. ovog zakona;
  - b) žalbama protiv presuda ili odluka koje donese upravno odjeljenje ovog suda, u smislu člana 57. ovog zakona;
  - c) žalbama protiv presuda sudova posljednje instance u Brčko Distriktu, u smislu čl. 37. ili 57. ovog zakona.
  - d) vanrednim pravnim lijekovima protiv pravomoćnih odluka koje su donijela odjeljenja Suda i protiv pravomoćnih odluka koje je donio sud posljednje instance u Brčko Distriktu, izuzev o zahtjevima za ponavljanje postupka.
2. Sud je također nadležan i za:
  - a) rješavanje po prigovorima koji se odnose na kršenje izbornog zakona i dodatnih propisa i uputstava koje donosi Stalna izborna komisija;
  - b) rješavanje u svim drugim predmetima kada je to predviđeno zakonom Bosne i Hercegovine.

#### **VANREDNI PRAVNI LIJEKOVI**

#### **Član 16. Krivična nadležnost**

1. Vanredni pravni lijekovi u krivičnom postupku su:
  - a) zahtjev za ponavljanje postupka;
  - b) zahtjev za zaštitu zakonitosti.

#### **Član 17. Upravna nadležnost**

1. Vanredni pravni lijekovi u upravnom postupku su:
  - a) zahtjev za ponavljanje postupka;
  - b) zahtjev za zaštitu zakonitosti;
  - c) zahtjev za preispitivanje sudske odluke.